

**ხობის მუნიციპალიტეტის საკრებულოს თავმჯდომარის ანგარიში**  
**ხობის მუნიციპალიტეტის საკრებულოს მიერ 2016 წელს გაწეული საქმიანობის თაობაზე**

მოგესალმებით, ქალბატონებო და ბატონებო,

მიგესალმები მუნიციპალიტეტის საკრებულოს, დამსწრე საზოგადოებას, მოწვეულ სტუმრებს.

მაქვს პატივი თქვენს წინაშე წარვსდგე საკრებულოს მიერ 2016 წელს გაწეული მუშაობის ანგარიშით.

2012 წლის 1 ოქტომბერს არჩევნებზე საქართველოს მოქალაქეებმა მხარი დაუჭირეს ქვეყნის განახლებისა და აღმშენებლობის კურსს. მოსახლეობის ნდობის მანდატით აღჭურვილმა საქართველოს ხელისუფლებამ, განვლილ პერიოდში, მნიშვნელოვან წარმატებებს მიაღწია ლიბერალურ-დემოკრატიულ ღირებულებებზე დაფუძნებული ინსტიტუტების მშენებლობის, მოქალაქეთა კონსტიტუციური უფლებების ხელშეუხლებლობის, დანაშაულისათვის სასჯელის გარდაუვალობისა და პოლიტიკური ნიშნით დევნის დაუშვებლობის მიმართულებით. აქტიურად მიმდინარეობდა მუშაობა ქვეყნის უსაფრთხოებისა და რეგიონალური პოზიციების გამყარებისათვის, გაღრმავდა ინტეგრაციის პროცესი ევროკავშირსა და ნატოსთან, მიმდინარეობდა ქვეყნის გამთლიანების პროცესისთვის გზების მიყვანა აფხაზეთსა და ოსებთან, საერთაშორისო თანამეგობრობის მხარდაჭრით რუსეთთან მოლაპარაკებებში კონკრეტული შედეგის მისაღწევად. გადაიდგა მნიშვნელოვანი ნაბიჯი უმუშევრობისა და სიღარიბის დაძლევის პოლიტიკის შემუშავების მიმართულებით, განხორციელდა ღონისძიებები მცირე და საშუალო ბიზნესისა და სოფლის მეურნეობის განვითარებისათვის, დაცულია კერძო საკუთრებისა და შრომის უფლებები, ტარდება ღონისძიებები შრომის უუნარო მოქალაქეებისათვის ცხოვრების ღირსეული პირობების შესაქმნელად უსაფრთხო სოციალური გარემოს დასამკვიდრებლად, ხელისუფლება ასევე ზრუნავს ქვეყნის ეროვნულ კულტურულ მემკვიდრეობაზე, ხელს უწყობს საგანმანათლებლო და სოციალ-ეკონომიკურ მოდერნიზაციას და უზრუნველყოფს მსოფლიო ეკონომიკურ სისტემაში ქვეყნის ინტეგრირებას.

მაქვს პატივი და უფლებამოსილება, დღეს თქვენს წინაშე წარვსდგე საფუძვლიანი და თამამი განცხადებით, რომ როგორც მთლიანად ხობის მუნიციპალიტეტის თვითმმართველობამ, ასევე საკრებულომ, საქართველოს მთავრობის კვალდაკვალ, ჩვენი ამომრჩეველისა და მოსახლეობის წინაშე კეთილსინდისიერად და ღირსეულად იმოღვაწა საანგარიშო პერიოდში. ვაცნობიერებთ რა, რომ ზუსტად ამ განწყობით დაგვიჭირა მხარი ხობის მუნიციპალიტეტის საზოგადოებამ 2014 წლის ადგილობრივ არჩევნებზე, ამით დაგვეკისრა უდიდესი პასუხისმგებლობა, რომელიც არ გვადლევს უფლებას არ გავამართლოთ მათი ნდობა, არ ვიფიქროთ მათ კეთილდღეობაზე და პრობლემების მოგვარებაზე. 2016 წელს საკრებულოს საქმიანობა ამ უმთავრესი პრინციპით იყო საფუძველდებული და თითოეული ჩვენგანი, შესაძლებლობების ფარგლებში, მაქსიმალურად ვიდევნოდით მუნიციპალიტეტის კეთილდღეობისათვის.

2014 წლის 15 ივნისს ჩატარდა ხობის მუნიციპალიტეტის ადგილობრივი თვითმმართველობის წარმომადგენლობითი ორგანოს - საკრებულოს არჩევნები, რომელიც ყველა საერთაშორისო სადამკვირვებლო მისიის დასკვნით ყველაზე დემოკრატიული არჩევნები იყო, რაც საქართველოს სხვა მოქალაქეებთან ერთად, ხობის მუნიციპალიტეტის საზოგადოების პოლიტიკურ სიმწიფეზე და არჩევნების ჩატარების პოლიტიკურ კულტურაზე მიგვანიშნებს.

მოგეხსენებათ, საკრებულო უპირველესად არის პოლიტიკური ორგანო, რომლის მუშაობის ძირითადი პრინციპია საკითხის კოლეგიური განხილვა და გადაწყვეტა. როგორც პოლიტიკური ორგანო, ის მუნიციპალიტეტში გამოხატავს პოლიტიკურ ძალთა თანაფარდობას და თავისი არსით და უმთავრესი ფუნქციით არის ადგილობრივი პოლიტიკის განმსაზღვრელი. საკრებულოში არჩეული საკრებულოს წევრების შემადგენლობა მრავალპარტიულია. კანონმდებლობის შესაბამისად, ხობის მუნიციპალიტეტის საკრებულო დაკომპლექტებულია 36 წევრით, აქედან: 15 წევრი არჩეულია პროპორციული საარჩევნო სისტემის საფუძველზე, მათ შორის 9 მანდატი მიიღო „ქართული ოცნება - დემოკრატიული საქართველო“, 4 მანდატი - „ერთიანმა ნაციონალურმა მოძრაობამ“, 1 - „ნინო ბურჯანაძე - ერთიანმა ოპოზიციამ“ და 1 მანდატი - „არასაპარლამენტო ოპოზიციამ (კახა კუკავა, ფიქრია ჩიხრაძე)“, ხოლო 21 საკრებულოს წევრი აირჩა - მაჟორიტარული საარჩევნო სისტემის საფუძველზე, მათ შორის: კოალიცია „ქართული ოცნებიდან“ - 16 წევრი, საინიციატივო ჯგუფის წარდგენით - 4 და 1 - „არასაპარლამენტო ოპოზიცია (კახა კუკავა, ფიქრია ჩიხრაძე)“ ბლოკიდან.

პოლიტიკური წარმომადგენლობის შესაბამისად, მესამე მოწვევის საკრებულოში ჩამოყალიბდა 6 ფრაქცია - „ქართული ოცნება დემოკრატიული საქართველო“; „ქართული ოცნება“; „ქართული ოცნება-რესპუბლიკელები“; „ერთიანი ნაციონალური მოძრაობა“; „თავისუფლება“ და „ხობი“. უნდა აღინიშნოს, რომ მიუხედავად საკრებულოს ფრაქციების განსხვავებული პოლიტიკური შეხედულებებისა რეგისტრირებულ ფრაქციათა უმეტესობა საკრებულოს ორგანოებთან კონსტრუქციულად მუშაობს, ისინი აქტიურად არიან ჩართული, როგორც საკრებულოს, ასევე საკრებულოს კომისიების მუშაობაში. რაც შეეხება ოპოზიციურ ფრაქციებს, ჩვენ მივესალმებით ჯანსაღ ოპოზიციას, რომელიც დაგვეხმარება ოპტიმალური გადაწყვეტილებების მიღების საქმეში.

საკრებულოში, ფუნქციონირებს 5 კომისია: სამანდატო-საპროცედურო საკითხთა კომისია, იურიდიულ საკითხთა და ადამიანის უფლებათა დაცვის კომისია, საფინანსო-სარევიზიო კომისია, სოციალურ საკითხთა კომისია და ეკონომიკური განვითარების საკითხთა კომისია. საკრებულოს ყველა წევრი გაწევრიანებულია ერთ, ან ორ კომისიაში.

სამანდატო-საპროცედურო საკითხთა კომისია ამზადებს დასკვნებს და შესაბამის პროექტებს საკრებულოს წევრის უფლებამოსილების ცნობისა და მისი შეწყვეტის თაობაზე; ახორციელებს კონტროლს საკრებულოს წევრთა მიერ საქართველოს კანონმდებლობითა და საკრებულოს დებულებით გათვალისწინებული მოთხოვნების შესრულებაზე; განიხილავს მათ მიერ

უფლებამოსილების განხორციელების პროცესთან დაკავშირებით შემოსულ შენიშვნებს და წინადადებებს; შეისწავლის ფრაქციის რეგისტრაციისთვის საჭირო მასალებს და საკრებულოს უახლოეს სხდომას წარუდგენს შესაბამის დასკვნას; შეიმუშავებს წინადადებებს თვითმმართველი ერთეულის სიმბოლოების დამტკიცების და მასში ცვლილებების შეტანის შესახებ; კომისიის შემადგენლობაში 7 საკრებულოს წევრია გაერთიანებული.

იურიდიულ საკითხთა და ადამიანის უფლებათა დაცვის კომისია ამზადებს საკრებულოს და საკრებულოს ბიუროს სხდომებზე განსახილველი სამართლებრივი აქტების პროექტებს და ახორციელებს ინიცირების წესით წარმოდგენილი პროექტების წინასწარ იურიდიულ ექსპერტიზას; შეიმუშავებს შესაბამის დასკვნებს; ეწევა იურიდიულ კონსულტაციებს დაინტერესებულ პირთათვის და ახორციელებს კონტროლს ადამიანის უფლებათა დაცვის უზრუნველსაყოფად. კომისიის შემადგენლობაში 6 საკრებულოს წევრია გაერთიანებული.

საფინანსო-სარევიზიო კომისია წინასწარ განიხილავს ბიუჯეტის, ადგილობრივი გადასახადების, ადგილობრივი მოსაკრებლებისა და მათში შესატანი ცვლილებების შესახებ პროექტებს; შეიმუშავებს დასკვნებსა და წინადადებებს; ყოველთვიურად განიხილავს თვითმმართველი ერთეულის საფინანსო ორგანოს მომზადებულ ადგილობრივი თვითმმართველი ერთეულის ბიუჯეტის შემოსულობების, გადასახდელების, ნაშთის ცვლილებისა და მთლიანი სალდოს ჩვენებით წარმოდგენილ ანგარიშს და შეიმუშავებს შესაბამის რეკომენდაციებს და წინადადებებს. კომისიის შემადგენლობაში 11 საკრებულოს წევრია გაერთიანებული.

სოციალურ საკითხთა კომისია განიხილავს განათლების, კულტურის და სპორტის განვითარების მუნიციპალურ პროგრამათა პროექტებს; სკოლამდელი და სკოლისგარეშე სააღმზრდელო დაწესებულებების არასამეწარმეო (არაკომერციულ) იურიდიული პირის ფორმით შექმნისა და მათი ფუნქციონირებასთან დაკავშირებულ საკითხებს; ადგილობრივი მნიშვნელობის ბიბლიოთეკების, მუზეუმების, თეატრების, გამოფენების, სპორტულ-გამაჯანსაღებელი ობიექტების საქმიანობის ხელშემწყობი მუნიციპალურ პროგრამათა პროექტებს; ჯანმრთელობის დაცვისა და სანიტარულ-ეპიდემოლოგიურ მომსახურების მუნიციპალურ პროგრამათა პროექტებს; თვითმმართველი ერთეულის ბიუჯეტიდან მოსახლეობის დამატებითი სოციალური მომსახურების სახეების დაფინანსების საკითხებს. კომისიის შემადგენლობაში 11 საკრებულოს წევრია გაერთიანებული.

ეკონომიკური განვითარების საკითხთა კომისია განიხილავს და საკრებულოს წარუდგენს წინადადებებსა და დასკვნებს თვითმმართველი ერთეულის სივრცით-ტერიტორიული დაგეგმვისა და თვითმმართველი ერთეულის სივრცით-ტერიტორიული დაგეგმვის ნორმებისა და წესების განსაზღვრის, თვითმმართველი ერთეულის ტერიტორიის ზონებად (ისტორიულ-კულტურულ, გამწვანების, დასვენების, სამრეწველო, სავაჭრო, სასოფლო-სამეურნეო დანიშნულების და სხვა სპეციალური ზონების) დაყოფის, მათი საზღვრების დადგენისა და

შეცვლის შესახებ; განიხილავს თვითმმართველი ერთეულის მიწათსარგებლობის გენერალური გეგმისა და განაშენიანების რეგულირების გეგმის პროექტებს და საკრებულოს წარუდგენს შესაბამის დასკვნებს; განიხილავს თვითმმართველი ერთეულის ტერიტორიის კეთილმოწყობისა და საინჟინრო ინფრასტრუქტურის განვითარების პროგრამათა პროექტებს და საკრებულოს წარუდგენს შესაბამის დასკვნებს; განიხილავს და საკრებულოს წარუდგენს წინადადებებს თვითმმართველი ერთეულის დასახლებებში ქუჩების, მოედნების სახელდებისა და ნუმერაციის შესახებ; განიხილავს და საკრებულოს წარუდგენს წინადადებებს თვითმმართველი ერთეულის ტერიტორიაზე ადგილობრივი მნიშვნელობის საავტომობილო გზებისა და საგზაო მოძრაობის დაგეგმარების შესახებ; განიხილავს და საკრებულოს წარუდგენს დასკვნებს თვითმმართველი ერთეულის ქონების ფლობის, განკარგვისა და ქონებით სარგებლობის წესების დადგენის შესახებ; განიხილავს და საკრებულოს წარუდგენს დასკვნებს თვითმმართველი ერთეულის ქონების საპრივატიზებო ობიექტების ნუსხის პროექტის დამტკიცების შესახებ.

გარდა დებულებით განსაზღვრული ფუნქციებისა, საკრებულოსა და საკრებულოს კომისიების გეგმიური და თანმიმდევრული მუშაობის ორგანიზების მიზნით, თითოეული კომისიის მიერ დგება კვარტალური და წლიური სამუშაო გეგმები, რაც შემდგომში საფუძვლად ედება საკრებულოს სამუშაო გეგმას. საკრებულოს სხდომაზე განსახილველი საკითხების მომზადებისთვის და ინიცირების წესით შემოსული პროექტების შესწავლისა და სათანადო დასკვნების მოსამზადებლად აქტიურ საქმიანობას ეწევიან საკრებულოს ზემოთ ჩამოთვლილი კომისიები. თითოეული გადაწყვეტილების მიღებამდე ხდება ყოველი პროექტის თუ წინადადების დეტალური შესწავლა, დამუშავება და დასკვნების მომზადება განსახილველი საკითხის მიზანშეწონილობის თაობაზე.

საკრებულოს წევრთა მიერ კომისიებზე და ფრაქციის სხდომებზე განხილული საკითხები საკრებულოს სხდომაზე განხილვამდე წარედგინება საკრებულოს ბიუროს სხდომას, რომელიც საკითხის სრულყოფილად შესწავლის შემთხვევაში იღებს გადაწყვეტილებას მისი საკრებულოს სხდომის დღის წესრიგში შეტანის შესახებ.

ამდენად, საკრებულოს ბიუროს, კომისიებისა და ფრაქციების მიერ შესწავლილი საკითხები საბოლოო გადაწყვეტილების მისაღებად წარედგინება საკრებულოს სხდომას. საანგარიშო პერიოდისთვის ჩატარდა საკრებულოს ბიუროს- 18 სხდომა და საკრებულოს -18 სხდომა, მათ შორის - 6 რიგგარეშე საკრებულოს სხდომა.

საკრებულოს სხდომა საჯაროა. ყოველი სხდომის დანიშნისას საკრებულოს აპარატის მიერ კეთდება შესაბამისი განცხადება სხდომის ჩატარების თარიღისა და დროის შესახებ. სხდომებს, გარდა მოწვეული პირებისა, ხშირად ესწრებიან საზოგადოებისა და მასმედიის წარმომადგენლები. სხდომებისა და საკრებულოს მუშაობის გამჭვირვალობისთვის საკრებულოს ყველა სხდომა

ფიქსირდება აუდეო-ვიდეო საშუალებებით, სხდომების შესახებ ინფორმაციები ქვეყნდება საკრებულოს ოფიციალურ ვებგვერდზე, საკრებულოს ოფიციალურ სოციალურ გვერდზე და ადგილობრივ პრესაში.

საკრებულოს კომისიების მიერ 2016 წლის განმავლობაში შესწავლილი და განხილული საკითხები წარედგინებოდა საკრებულოს ბიუროს, რომლებიც განსახილველად და საბოლოო გადაწყვეტილების მისაღებად საკრებულოს სხდომის დღის წესრიგში იქნა შეტანილი, რის შემდგომაც მიღებულია 25 ნორმატიული აქტი – დადგენილება, 70 ინდივიდუალური აქტი - განკარგულება, მოსმენილ და შეფასებულ იქნა გამგეობის მიერ გაწეული მუშაობის ანგარიში, პერიოდულად განიხილებოდა ინფორმაციები ადგილობრივი ბიუჯეტის შესრულების მიმდინარეობის თაობაზე.

განსხვავებული შინაარსის, მოსამზადებლად განსაკუთრებული მუშაობისა და შრომატევადობის, მარეგულირებელი ნორმების, წესებისა და პროცედურების განსაზღვრის მხრივ, საკრებულოს 2016 წელს მიღებული ნორმატიული აქტებიდან შეიძლება გამოიყოს შემდეგი დადგენილებები:

ა) ხობის მუნიციპალიტეტის დასახლების საერთო კრების ტიპური დებულების დამტკიცების შესახებ;

ბ) ხობის მუნიციპალიტეტის ტერიტორიაზე სახელმწიფო და ხობის მუნიციპალიტეტის საკუთრებაში არსებული არასასოფლო-სამეურნეო დანიშნულების მიწის ნორმატიული ფასის დადგენის შესახებ;

გ) ხობის ავტოსატრანსპორტო საშუალებების მოძრაობის რეგულირების შესახებ;

დ) ხობის მუნიციპალიტეტის 2017 წლის ადგილობრივი ბიუჯეტის დამტკიცების შესახებ;

საკრებულოს განკარგულებებიდან შეიძლება გამოიყოს:

ა) საქართველოს რეგიონებში განსახორციელებელი ფონდიდან ხობის მუნიციპალიტეტში 2016 წელს დასაფინანსებელი ადგილობრივი თვითმმართველობის პროექტების დაფინანსების მიზნით მომზადებული წინადადებების მოწონების შესახებ;

ბ) საკრებულოს წევრის შოთა სირაძის უფლებამოსილების შეწყვეტის შესახებ;

გ) ხობის მუნიციპალიტეტის მოსახლეობის ჯანმრთელობის დაცვის 2016 წლის მუნიციპალური პროგრამის დამტკიცების შესახებ;

დ) სოფლის მხარდაჭერის პროგრამის ფარგლებში განსახორციელებელი პროექტების შესახებ;

ე) ხობის ცენტრალური სტადიონისათვის პაატა თათარიშვილის სახელის მინიჭების მიზანშეწონილობის თაობაზე;

ვ) ხობის მუნიციპალიტეტის კლიმატის ცვლილებასთან ადაპტაციის კონცეფციის დამტკიცების შესახებ;

ზ) ხობის მუნიციპალიტეტის საკრებულოს შუალედური არჩევნების შედეგად ხობის მუნიციპალიტეტის საკრებულოს წევრის კობა კაკულიას უფლებამოსილების ცნობის შესახებ;

თ) ხობის მუნიციპალიტეტის საკრებულოს ზოგიერთი განკარგულების ნაწილის ძალადაკარგულად გამოცხადების შესახებ;

ი) ხობის მუნიციპალიტეტის ადგილობრივი თვითმმართველობის კვალიფიკაციის ამაღლების 2017 წლის გეგმის დამტკიცების შესახებ;

კ) შეზღუდული პასუხისმგებლობის საზოგადოება- „ხობის მოამბეს“ ლიკვიდაციაზე ხობის მუნიციპალიტეტის გამგებლისთვის თანხმობის მიცემის შესახებ“

ლ) არასამეწარმეო(არაკომერციული) იურიდიული პირის- „ხობის მუნიციპალიტეტის კულტურის ცენტრის“ არასამეწარმეო (არაკომერციული) იურიდიული პირის- „ხობის მუნიციპალიტეტის განათლების ცენტრის“ რეორგანიზაციაზე ხობის მუნიციპალიტეტის გამგებლისთვის თანხმობის მიცემის შესახებ;

მ) საქართველოს რეგიონებში განსახორციელებელი პროექტების ფონდიდან ხობის მუნიციპალიტეტში 2017 წელს დასაფინანსებელი ადგილობრივი თვითმმართველობის პროექტების დაფინანსების მიზნით მომზადებული წინადადებების მოწონების შესახებ;

ნ) ხობის მუნიციპალიტეტის სოციალურად დაუცველი და ეკონომიკურად შეჭირვებული მოსახლეობის სოციალ-ეკონომიკური მდგომარეობის გაუმჯობესებისა და ხელშეწყობის 2017 წლის მუნიციპალური პროგრამის დამტკიცების შესახებ;

ო) ხობის მუნიციპალიტეტის მოსახლეობის ჯანმრთელობის დაცვის 2017 წლის მუნიციპალური პროგრამის დამტკიცების შესახებ;

საჯაროობის პრინციპიდან გამომდინარე საკრებულოს მიერ მიღებული ყველა გადაწყვეტილება ხელმისაწვდომია დაინტერესებულ პირთათვის. ყველა ნორმატიული აქტი მიღებიდან მეორე დღეს გამოსაქვეყნებლად იგზავნება საქართველოს საკანონმდებლო მაცნეში და ასევე ქვეყნდება ადგილობრივ პრესაში, ხოლო საკრებულოს ოფიციალურ ვებგვერდზე განთავსებულია 2006 წლიდან დღემდე მიღებული როგორც ნორმატიული, ასევე ინდივიდუალური აქტები.

საკრებულოს მხრიდან განსაკუთრებით დიდი ყურადღება ექცევა ადგილობრივი ბიუჯეტის პროექტის ფორმირებასა და განხილვას, ბიუჯეტის შესრულების მიმდინარეობაზე კონტროლს. 2017 წლის ადგილობრივი ბიუჯეტის მიღებამდე, ის განსახილველად გამოქვეყნდა, როგორც ადგილობრივ პრესაში, ასევე საკრებულოს ოფიციალურ ვებგვერდზე. პროექტი განხილულ იქნა მოსახლეობასთანაც, რის შემდეგაც საკრებულოს მხრიდან განხილულ და მხარდაჭერილ იქნა 2017 წლის მუნიციპალიტეტის მთავარი საფინანსო დოკუმენტი. რაც შეეხება ბიუჯეტის შესრულების მიმდინარეობაზე პერიოდულ ინფორმაციას საკრებულოს სხდომებზე აღმასრულებელი ორგანოს

მიერ წარმოდგენილ იქნა ბიუჯეტის შესრულების 2015 წლის შედეგები და 2016 წლის კვარტალური შესრულების ანგარიშები.

საკრებულოს კომისიებს, ფრაქციებს და მთლიანად საკრებულოს, უფლებამოსილების სრულყოფილად წარმართვისა და მათი საქმიანობის ორგანიზაციული უზრუნველყოფის მიზნით ემსახურება საკრებულოს აპარატი, რომელიც დაკომპლექტებულია ახალგაზრდა, ენერგიული და კომპეტენტური კადრებით. აპარატის მოსამსახურეები აქტიურად არიან ჩართულნი საკრებულოს მუშაობაში. საკრებულოს და საკრებულოს აპარატის დებულებაში ვრცლად არის გაწერილი საკრებულოს აპარატის ფუნქციები და უფლებამოსილებები და საკრებულოს აპარატის მიერ განხორციელებული საქმიანობა წარმოაჩენს მთლიანად საკრებულოს მუშაობას. აპარატში შექმნილია 2 განყოფილება - იურიდიულ საკითხთა და საქმისწარმოების განყოფილება და საორგანიზაციო საკითხთა განყოფილება, რომელთა მეშვეობით აპარატში დიფერენცირებულად ხორციელდება ყველა სახის სამუშაო. ელექტრონული სერვისების პროგრამის დანერგვის შემდეგ მოქალაქეები ოპერატიულად, მარტივად და ეფექტურად იღებენ სათანადო მომსახურებას მოქალაქეთა მისაღებში კანცელარიის ოპერატორებისგან.

აღსანიშნავია, რომ საკრებულოში 2016 წელს საკრებულოს აპარატის მიერ აღრიცხულია საკრებულოს თანამდებობის პირების სახელზე შემოსული 612 კორესპონდენცია, გაგზავნილია 441, აქედან: უმაღლესი საკანონმდებლო და აღმასრულებელი ორგანოებიდან - შემოსულია 3, გაგზავნილია 11; სასამართლო ხელისუფლების ორგანოებიდან შემოსულია 12 და გაგზავნილია 4; სამინისტროში და საჯარო სამართლის იურიდიულ პირებიდან შემოსულია 49 და გაგზავნილია 42; ადგილობრივი თვითმმართველობის ორგანოებიდან, მუნიციპალიტეტის იურიდიულ პირებიდან და სხვადასხვა ორგანიზაციებიდან შემოსულია 50 და გაგზავნილია 115; შიდა კორესპონდენციები 96; სახელმწიფო რწმუნებულის-გუბერნატორის ადმინისტრაციიდან შემოსულია 10 და გაგზავნილია 19 კორესპონდენცია; გამგეობიდან შემოსულია 122 და გაგზავნილია 250; მოქალაქეთა ადმინისტრაციული საჩივრის განცხადებიდან შემოსულია 366;

შესაბამისად, საკრებულოს აპარატში შემოსული კორესპონდენციის დიდი ნაწილი განცხადებების წილად მოდის, რომელთაგან მნიშვნელოვანი ადგილი უკავია განცხადებებს დასაქმებისა და მძიმე ეკონომიკური პირობებიდან გამომდინარე დახმარების შესახებ. ასევე ხშირია მომართვები საჯარო ინფორმაციის მოთხოვნის, დოკუმენტთა ასლების და ამონაწერების გაცემის შესახებ. ნებისმიერი მოთხოვნილი ინფორმაცია და დოკუმენტის ასლი გაიცემა დაუყოვნებლივ. ხოლო საკითხები, რომელიც საკრებულოს კომპეტენციას არ მიეკუთვნება - იგზავნება შესაბამის ორგანოებში რეაგირებისთვის. შედარებით პრობლემატურია მოსახლეობის მოთხოვნების დაკმაყოფილება სამუშაო ადგილებით უზრუნველყოფის შესახებ, თუმცა ადგილობრივი ხელისუფლება მაქსიმალურად ცდილობს ამ საკითხის მოგვარებაში დახმარება გაუწიოს მუნიციპალიტეტის მოსახლეობას.

აპარატის მიერ 2016 წელს დამუშავდა და საუწყებო არქივისთვის მომზადდა 2014-2015 წლების კორესპონდენცია და საკრებულოს და საკრებულოს ბიუროს სხდომის მასალები.

საკრებულოს თავმჯდომარის მიერ პირად შემადგენლობისადმი გამოიცა 102 ბრძანება, ხოლო საერთო ორგანიზაციულ საკითხებზე - 20 ბრძანება.

საკრებულოს თანამდებობის პირთა და მოსამსახურეთა სამუშაო დროის დიდი ნაწილი ეთმობა საზოგადოების წარმომადგენელთა მიღებას, მათი პრობლემების შესწავლას და კომპეტენციის ფარგლებში სათანადო კონსულტაციების გაწევას. მსგავს საკითხებზე შეზღუდვები არ არის დაწესებული და, ფაქტობრივად, ყოველდღიურ ხასიათს ატარებს. მხოლოდ საკრებულოს თავმჯდომარესთან აღრიცხული მოქალაქეთა ვიზიტების რაოდენობა 1412-ს შეადგენს.

საორგანიზაციო და სამართლებრივი კონსულტაციების მიღების მიზნით საკრებულოს მჭიდრო კავშირურთიერთობები აქვს ზემდგომ და სხვადასხვა სახელმწიფო ორგანიზაციასთან, სახელმწიფო რწმუნებულის - გუბერნატორის ადმინისტრაციასთან.

საკრებულო აქტიურად თანამშრომლობს სხვადასხვა არასამთავრობო ორგანიზაციებთან საჯარო სამართლის იურიდიულ პირებთან, როგორებიცაა: ეფექტიანი მმართველობის სისტემის და ტერიტორიული მოწყობის რეფორმების ცენტრი, ადგილობრივ თვითმმართველობათა ასოციაცია, საერთაშორისო გამჭვირვალობა-საქართველო, დემოკრატიის ინსტიტუტი, გარემოს დაცვის და მდგრადი განვითარების ასოციაცია და სხვა.

აღსანიშნავია, რომ საკრებულოს მხრიდან განსაკუთრებული ყურადღება ექცევა დასაქმებულთა შორის გენდერულ ბალანსს. საკრებულოს 36 წევრიდან 4 ქალია, აქედან 1 საკრებულოს კომისიის თავმჯდომარეა, ხოლო საკრებულოს აპარატში დასაქმებულია 9 ქალი და 6 მამაკაცი.

საკრებულოსთვის განსაკუთრებულად მნიშვნელოვანია ურთიერთობა აღმასრულებელ ორგანოსთან. საკრებულოს და გამგეობის კოორდინირებული საქმიანობა ძირითადი საფუძველია მუნიციპალიტეტში ადგილობრივი ხელისუფლების მიერ განსახორციელებელი სამუშაოების წარმატებით შესრულებისა. წარმოდგენილ ანგარიშში არაერთხელ გაესვა ხაზი, რომ საკრებულოს მიერ მიღებული გადაწყვეტილებების დიდი ნაწილი გამგეობის მიერ იყო ინიცირებული. საკრებულოს მიერ სისტემატურად განიხილებოდა გამგეობის მიერ მოწოდებული პროექტები თუ წინადადებები. შემოსული პროექტებიდან ყველაზე მიღებულია შესაბამისი გადაწყვეტილება, ხოლო შემოთავაზებული წინადადებები აქტიურად განიხილებოდა კომისიების და ბიუროს მიერ. წარმომადგენლობითი და აღმასრულებელი ორგანოებისთვის კანონმდებლობით მინიჭებული უფლებამოსილებების ფარგლებში აქტიურად მიმდინარეობს თანამშრომლობა სხვადასხვა ძირეულ საკითხზე.

საქართველოს ორგანული კანონის „ადგილობრივი თვითმმართველობის კოდექსი“ შესაბამისად



აღსანიშნავია, ის ფაქტი, რომ მესამე მოწვევის საკრებულომ მიიღო გადაწყვეტილება და დააწესა ცოტნე დადიანის სახელობის ჯილდოს და განსაზღვრა ხობის საპატიო მოქალაქეობის მინიჭების წესი. რომლის თანახმადაც ცოტნე დადიანის სახელობის ჯილდოს გადაცემა ხდება წელიწადში ერთჯერ და გადაეცემა მხოლოდ ორ სხვადასხვა ფიზიკურ პირს, შესაბამისად პირველი ხარისხის ჯილდო და მეორე ხარისხის ჯილდო. ჯილდოს გადაცემის თარიღია წმინდა ცოტნე აღმსარებლის ხსენების დღე, ყოველი წლის 12 აგვისტო. ცოტნე დადიანის სახელობის ჯილდო გადაეცემა პირს კულტურის, განათლების, სპორტის, ხელოვნების, ჯანმრთელობის დაცვისა და მეცნიერების სფეროში მიღწეული განსაკუთრებული წარმატებისათვის, ქვეყნისა და მუნიციპალიტეტის წინაშე გაწეული დამსახურებული საზოგადო მოღვაწეობისათვის, ხოლო ხობის საპატიო მოქალაქეობა ენიჭება პირს ხობის მუნიციპალიტეტის წინაშე გაწეული დამსახურებისთვის, ქვეყნის აღმშენებლობის საქმეში შეტანილი განსაკუთრებული წვლილისა და მაღალი პროფესიული ოსტატობისთვის.

დამეთანხმებით, წარმოდგენილი ანგარიშიდან თვალნათლივანა წარმოჩენილი, რომ 2016 წლის განმავლობაში საკრებულო მრავალმხრივ და მნიშვნელოვან მუშაობას ეწეოდა სხვადასხვა საკითხების განხილვასა და გადაწყვეტილებების მიღების პროცესში. სისტემატურად უწევდა ზედამხედველობას საკრებულოსადმი დაქვემდებარებული სტრუქტურების საქმიანობას; სახელმწიფო და კერძო ორგანიზაციების ინტერესების, მოქალაქეთა კონსტიტუციით გარანტირებული უფლებებისა და თავისუფლებების დაცვას; საზოგადოების მოთხოვნებისა და საჭიროებების შესწავლას; მოსახლეობის საჩივრებისა და წინადადებების გაანალიზებას; მოქალაქეთა მიღებას, მათი განცხადებების განხილვას; პრობლემური საკითხების დროულად გადაჭრას.

მე მოგახსენეთ იმ საქმიანობის შესახებ, რომელიც ხობის მუნიციპალიტეტის საკრებულოს მიერ 2016 წელს იქნა გაწეული. არც თუ მცირედი სამუშაო გასწია საკრებულომ ამ საანგარიშო პერიოდში, თუმცა ჩვენ მზად ვართ, მოვისმინოთ დასაბუთებული შენიშვნები, მივიღოთ ობიექტური კრიტიკა, გავითვალისწინოთ საქმიანი წინადადებები. ყოველივე ეს ხელს შეგვიწყობს, მივალწიოთ ჩვენს უმთავრეს მიზანს - გავამართლოთ ხალხის ნდობა და ხობის მუნიციპალიტეტი გავხადოთ წარმატებული, ღრმად ვარ დარწმუნებული ყოველი მომდევნო წელი გაცილებით უკეთესი იქნება მუნიციპალიტეტის მოსახლეობისათვის. ჩვენი ქვეყნის, მუნიციპალიტეტის მომავალი დღეს ჩვენ უნდა შევქმნათ და უფლება არ გვაქვს ხელიდან გავუშვათ ამის შესაძლებლობა, შეცდომებსა და წარუმატებლობას ვერავის ვერ გადავებრალებთ და ვერ ვიმართლებთ თავს ვერც დღევანდელივით და ვერც მომავალთან, რადგან უნდა გვახსოვდეს დღეს აქ ვდგევართ და ვქმნით არა მარტო აწმყოს, არამედ მომავალსაც. მინდა დაგარწმუნოთ, რომ ჩვენი სადეპუტატო საქმიანობის მთავარი მიზანია გავხადოთ ხობის მუნიციპალიტეტი უფრო

წარმატებული, რათა განვამტკიცოთ თითოეული მოქალაქისა და ოჯახის კეთილდღეობა და ეკონომიკური აღმავლობა.

და ბოლოს, მინდა მადლობა გადავუხადო საკრებულოს თითოეულ წევრს, საკრებულოს აპარატს, ხობის მუნიციპალიტეტის გამგებელს, მის მოადგილეებს, სამსახურის უფროსებს და გამგეობის თანამშრომლებს საკრებულოსთან თანამშრომლობისა და 2016 წელს გაწეული საქმიანობისათვის.

ედიშერ ჯობავა

2017 წელი -- მარტი